

սը անհետացաւ զետնի տակ մի փոսի մէջ, մնաց այնտեղ երեք տարի թաղնուած, յետոյ ելաւ նոր առաքելութեան համար:

Ստրաբոնի տեղեկութեամբ, Չալմոքսը սկզբում քուրմ էր, յետոյ աստուածացաւ, եւ որ քաշուած էր անմատոյց տեղեր, եւ ճգնում էր քարայրներում, եւ տեսակցում միմիայն թաղաւորի հետ եւ նրան պատգամներ տալիս: Այս է պատճառը, աւելացնում է հռչակաւոր աշխարհագիրը, որ այժմ էլ Գետ թրակիական ժողովուրդի թաղաւորը միշտ մի խորհրդական ունի, որ եւ համարուած է աստուած. (Strab. VII 3. 5.):

Նոյն կերպ եւ Ատիսը, Ադոնիսը եւ նման աստուածութիւններն ու դիւցազները տարէցտարի անյայտանում էին, որ յետոյ երեւին, մեռնում էին, որ յետոյ յարութիւն առնեն: Արէսն էլ, տեսանք, մնաց 13 ամիս կալանաւոր երկաթէ թոնրի մէջ, ուրեմն փոսի մէջ եւ յետոյ արձակուեց:

Հռչակաւոր Զրադաշտը, Իրանի մեծ մարգարէն, նմանապէս փակուեց թաղաւորի հրամանով, փոսի մէջ, (Zendani gah), ուր մի բարեպաշտ ամէն օր հաց էր ձգում: (Le livre de Zoroastre Zaratust nama. Fr. Rosenberg 1904, էջ 49):

Հայ բուն ժողովրդական միջավայրում, ուսմիկ խաւերում (ոչ տիրոջ նախարարական շրջանում) տակաւին մեռած չի եղել հինաւուրց հաւատալիքը: Եւ այդ է, որ Գրիգորին 13 տարի ապրել է տալիս խոր եւ անխոյս վերապի մէջ:

Զարմանալի չէ. յայտնի է, որ նոյնիսկ մեծ վարդապետի կեանքը գերծ չէ հին վերապրումներից, քանի որ նրա շարժարանքը եւ երեքօրեայ յարութիւնը որոշ չափով մի խորհրդաւոր անդրադարձ է Ադոնիսեան կարգերի: Զատկական տօները տեսանք որ Ադոնիսեան հանդէսների ընդօրինակութիւնն են նոր բովանդակութեամբ: Հրէական Պասեքը իր արմատով եւս թամուզի պաշտամունքի հետանկարն է, որ քահանայտանական դիտուն մեկնութիւնը աշխատել է յարմարցնել հրէական անցեալի նշանաւոր երեւոյթներին: Գարնան հասարակածի շուրջը բեւեռած տօնական հան-

դէսները նոյն հին պաշտամունքի աղօտացած յուշերն են:

Եթէ եկեղեցու տեսակէտից Զատիկը հրէական Պասեքի արտատիպն է, ժողովրդեան համար հին նոր կերպարանաւորումն է:

Ազաթանդեղոսի ասելով, Լուսաւորչիք մնում է վիրապի մէջ 13 տարի (ԺԱ. ԺԲ.): Նկատենք անցողակի, որ գլ. Ի. ԻԱ. ԻԲ. նոյն պատմիչը հաշուած է 15 տարի — ահներեւ ապացոյց է, որ Ազաթանդեղոս խմբագրական գործ է, տարբեր աղբիւրներից քաղած:

Տեսանք, որ Ատիս-Ադոնիսը կենդանանում են երեքօրեայ մահից յետոյ. Չալմոքսը չքանում է երեք տարի, իսկ Արէսը պահուած է թոնրի մէջ ուղիղ 13 ամիս:

Արէսի եւ Լուսաւորչի թոնրի մէջ նկատելի է զուգադիպութիւն, մանաւանդ որ Ազաթանդեղոսի ձեռագիրները տալիս են երբեմն 13 ամիս ընթերցումը:

Թւում է, որ 13 ամիսը սկզբնական է, որ շատ վաղ դարձել է տարի, որի հետեւանքով առաջացել է եւ ժամանակագրական շփոթ, եւ ոչ միայն Գրիգորի կեանքն է երկարացրած մինչեւ Նիկիոյ ժողովը, այլ եւ թերեւս յետագած հայ լուսաւորութեան տարին մինչեւ չորրորդ դարու սկիզբը:

Եթէ Զալմոքսի եռամեայ քունը այլաբանական արտայայտութիւն է թրակիայում ընդունուած սովորոյթին, որով հողին երեք տարի հանգիստ էին տալիս, ապա եւ Լուսաւորչի 13 ամիսը (կամ տարին) նոյնպիսի փոխարեւորական չափ է հայ երկրագործի համար: Տասնեւերեք ամիսը կազմում է հայ տոմարական տարին, հաշուած եւ Աւելեաց պակասաւոր ամիսը:

Ասել է, թէ հայերի մօտ սովորութիւն է եղել տարեկան հանգիստ տալ հողին, որ մինչեւ այժմ էլ մնացել է շատ տեղերում մանաւանդ անջրդի արտերի նկատմամբ:

Կլէմմբրոտի գրոյցը խորհրդաւոր արեւելցու մասին, որ ամբողջ տարին ապրում էր ուրիշների հետ եւ միայն մի անգամ էր երեւում մարդկանց, օժտուած չնաշխարհիկ յատկութիւններով, դարձեալ պատկերաւոր արտայայտութիւն է հողի տարեկան դադարին:

Փոխզական խորհուրդում, որի նիւթը Կիրէլի եւ Ատիսի կեանքն էր, ընդունուած էր